

VENDIM
Nr. 32, datë 13.10.2025

**PËR REFUZIMIN E APLIKIMIT TË SHOQËRISË RAJONALE UJËSJELLËS-
KANALIZIME KUKËS SHA PËR NIVEL TË RI TARIFOR**

Në mbështetje të neneve 13, 14, 21 dhe 22, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, të ndryshuar (ligji nr. 8102), dhe të neneve 8, 10, 13 të vendimit të Komisionit Kombëtar Rregullator nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime” (vendim i KKRR-së nr. 539); të vendimit të KKRR-së nr. 22, datë 14.7.2025, “Për shtyrje afati të plotësimit të dokumentacionit në procedurën e aplikimit për nivel të ri tarifor për Shoqërinë Rajonale Ujësjellës-Kanalizime Kukës sh.a.”,

KOMISIONI KOMBËTAR RREGULLATOR,

në mbledhjen e datës 13.10.2025, pasi shqyrtoi dokumentacionin e paraqitur nga Drejtoria Tekniko-Ekonomike mbi kërkesën e Shoqërisë Rajonale Ujësjellës-Kanalizime Kukës sh.a. për ndryshimin e nivelit tarifor për shërbimin e furnizimit me ujë dhe largimit të ujërave të ndotura.

KONSTATON SE:

1. Shoqëria Rajonale Ujësjellës-Kanalizime Kukës sh.a. është licencuar me vendimin e KKRR-së nr. 3, datë 30.1.2023, “Për licencimin e Shoqërisë Rajonale Ujësjellës-Kanalizime Kukës sh.a.”, për grumbullimin dhe shpërndarjen e ujit për konsum publik dhe largimin e ujërave të ndotura.

2. Shoqëria Rajonale Ujësjellës-Kanalizime Kukës sh.a. ka aplikuar pranë ERRU-së me shkresën nr. 349 prot., datë 27.6.2025, me lëndë “Kërkesë për nivel të ri tarife për shërbimin e furnizimit me ujë të pijshëm dhe largimin (kanalizime) e ujërave të ndotura”, protokolluar me tonën nr. 355 prot., datë 30.6.2025.

3. Bazuar në pikën 1, neni 10, i vendimit të KKRR-së nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”, aplikimi për ndryshimin e nivelit tarifor nga shoqëria, pranë ERRU-së, duhet të përmbajë dokumentacionin e mëposhtëm:

a) kërkesa zyrtare drejtuar ERRU-së për ndryshimin e tarifave për shërbimet ujësjellës, kanalizime, dhe ITUN;

b) pasqyrat financiare të vitit paraardhës certifikuar nga një ekspert kontabël i autorizuar;

c) plani 5-vjeçar i biznesit, ku të paraqitet edhe programi i investimeve dhe aseteve të reja, i cili do të hartohet në përputhje me formatin e aprovuar në këtë metodologji nga ERRU-ja, që është i detyrueshëm vetëm për grupin e shoqërive që tentojnë të mbulojnë 100% të kostove totale;

d) modeli i aplikimit për nivelin e ri tarifor. Të gjitha tabelat e modelit paraqiten të printuara dhe të firmosura nga shoqëria dhe sipas formatit excel të miratuar nga ERRU-ja;

e) organigramë dhe përshkrimet e punës së stafit sipas pozicionit të tyre;

f) aktmarrëveshjet e kredisë midis shoqërisë dhe institucioneve kredidhënëse, në rast se shoqëria është financuar me hua dhe skema e planit mujor të shlyerjeve gjatë viteve të kaluara dhe viteve të ardhshme;

g) mendimin e pushtetit vendor për tarifën e propozuar të shprehur në vendimin përkatës dhe konfirmuar nga prefekti i qarkut për legjitimitetin e tij;

h) vendimi i Këshillit të Administrimit për miratimin e tarifave të propozuara;

i) procesverbali i seancave dëgjimore me publikun sipas formatit të përcaktuar nga ERRU-ja;

j) subvencionet e përfituara nga operatori dhe ato të nevojshme gjatë periudhës rregullore të tarifave të propozuara;

k) lejet ose autorizimet për përdorimin e ujit për shoqëritë UK lëshuar nga këshilli i basenit ujqor të shoqëruara me marrëveshjen ndërmjet shoqërisë UK dhe KBU-së për pagesën e tarifave për përdorimin e ujit;

l) raport i detajuar për gjendjen teknike të sistemeve të furnizimit me ujë dhe kanalizimeve të ujërave të ndotura, në të cilën të përshkruhet inventari i aseteve në përdorim të shoqërisë me të dhëna teknike (përmasat, lloji i materialit, vitet të instalimit/ndërtimit), përfshirë dhe prioritetet për zëvendësimin e tyre. Ky material do të hartohet sipas formatit të përcaktuar nga ERRU-ja;

m) relacion analitik ekonomik për vitin paraardhës, si dhe për periudhën rregullore që kërkohet ndryshimi i tarifave, në të cilën shprehet qartë justifikimi dhe argumentet përkatëse dhe objektivat e shoqërisë për përmirësimin e treguesve të punës;

n) në rast se shoqëria aplikon për tarifë shitje uji me shumicë, në kërkesën e saj për tarifë duhet të paraqesë: relacion teknik dhe ekonomik me llogaritjet e tarifës së shitjes së ujit me shumicë, miratimin e tarifës së kërkuar nga organet drejtuese, si dhe aktmarrëveshjet midis palëve shitës-blerës;

o) të ketë shlyer detyrimet për pagesën rregullore sipas kontratës së nënshkruar midis ERRU-së dhe shoqërisë, dhe në rast të detyrimeve të prapambetura të ketë shlyer sipas marrëveshjes së nënshkruar mes tyre për shlyerjen me këste të tyre;

p) deklarata për vërtetësinë dhe saktësinë e të dhënave sipas nenit 26 dhe nenit 46 të kësaj metodologjie.

4. Nga shqyrtimi i dokumentacionit të paraqitur nga Shoqëria Rajonale Ujësjellës-Kanalizime Kukës sh.a. deri më datë 13.10.2025, evidentohet se mungojnë këto dokumente:

a) bilanci dhe pasqyrat financiare të vitit paraardhës, të certifikuara nga një ekspert kontabël i autorizuar për secilën shoqëri UK;

b) raporti i audituesit të pavarur;

c) modeli i aplikimit për nivelin e ri tarifor nuk është paraqitur aplikimi në formë elektronike, gjithashtu, dhe modeli i aplikimit i dorëzuar fizikisht është i paplotësuar, nuk janë të gjitha informacionet që duhen sipas metodologjisë;

d) mendimi i pushtetit vendor për tarifën e propozuar të shprehur në vendimin përkatës dhe konfirmuar nga prefekti i qarkut për legjitimitetin e tij;

e) procesverbali i seancave dëgjimore me publikun sipas formatit të përcaktuar nga ERRU-ja, për secilën bashki (nuk janë zhvilluar seanca dëgjimore me publikun);

f) subvencionet e përfituara nga operatori dhe ato të nevojshme gjatë periudhës rregullore të tarifave të propozuara;

g) relacion analitik ekonomik për vitin paraardhës, si dhe për periudhën rregullore që kërkohet ndryshimi i tarifave;

h) lejet ose autorizimet për përdorimin e ujit për shoqëritë UK lëshuar nga këshilli i basenit ujqor (aplikime pranë AMBU-së);

i) nuk ka likuiduar detyrimet për pagesën rregullore, për vitet 2023, 2024 dhe 2025.

Për gjithë sa më sipër, Komisioni Kombëtar Rregullator, pasi arriti në përfundimin se aplikimi i Shoqërisë Rajonale Ujësjellës-Kanalizime Kukës sh.a. nuk plotëson parashikimin e pikës 2, të

nenit 10, të vendimit nr. 539, datë 30.12.2021, “Për miratimin e metodologjisë dhe procedurës për miratimin e tarifave të shërbimeve ujësjellës-kanalizime”,

VENDOSI:

1. Të refuzojë aplikimin e Shoqërisë Rajonale Ujësjellës-Kanalizime Kukës sh.a. për nivel të ri tarifor për shërbimin e furnizimit me ujë dhe kanalizime.

2. Drejtoria Teknike Ekonomike detyrohet të njoftojë Shoqërinë Rajonale Ujësjellës-Kanalizime Kukës për vendimin e Komisionit Kombëtar Rregullator.

3. Detyrimin e Shoqërisë Rajonale Ujësjellës-Kanalizime Kukës sh.a. të aplikojë brenda datës 30 qershor 2026 për nivel të ri tarifor, sipas metodologjisë dhe procedurës për miratimin e tarifave të shërbimeve ujësjellës-kanalizime, me të dhëna të përditësuara.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETAR
Gerta Lubonja